



# SLUŽBENE NOVINE

## TUZLANSKO-PODRINJSKOG KANTONA

Godina 4 - Broj 7

Srijeda, 25. juni/lipanj 1997. g.  
TUZLA

Izdanje na  
bosanskom i hrvatskom  
jeziku

### 376

Na osnovu člana V.1.4. Ustava Federacije Bosne i Hercegovine i člana 24. tačka a) Ustavnog zakona Tuzlansko-podrinjskog kantona, Skupština Tuzlansko-podrinjskog kantona, na sjednici od 19. 6. 1997. godine, donosi

### ODLUKU

#### O PROGLAŠENJU USTAVA TUZLANSKO-PODRINJSKOG KANTONA

Proglašava se Ustav Tuzlansko-podrinjskog kantona kojeg je usvojila Skupština Tuzlansko-podrinjskog kantona, na sjednici od 19. 6. 1997. godine.

Ustav Tuzlansko-podrinjskog kantona stupa na snagu u ponoć 19. 6. 1997. godine.

Bosna i Hercegovina Federacija Bosne i Hercegovine TUZLANSKO-PODRINJSKI KANTON Skupština Broj: 01/011-240-15/97 Tuzla, 19. 6. 1997. g.	Predsjedavajući Skupštinom Tuzlansko-podrinjskog kantona, Fuad Hadžić, v.r.
--	--

### 376

Na temelju članka V.1.4. Ustava Federacije Bosne i Hercegovine i članka 24. točka a) Ustavnog zakona Tuzlansko-podrinjske županije, Sabor Tuzlansko-podrinjske županije, na sjednici od 19. 6. 1997. godine, donosi

### ODLUKU

#### O PROGLAŠENJU USTAVA TUZLANSKO-PODRINJSKE ŽUPANIJE

Proglašava se Ustav Tuzlansko-podrinjske županije kojeg je usvojio Sabor Tuzlansko-podrinjske županije, na sjednici od 19. 6. 1997. godine.

Ustav Tuzlansko-podrinjske županije stupa na snagu u ponoć 19. 6. 1997. godine.

Bosna i Hercegovina Federacija Bosne i Hercegovine TUZLANSKO-PODRINJSKA ŽUPANIJA Sabor Broj: 01/011-240-15/97 Tuzla, 19. 6. 1997. g.	Predsjedatelj Saborom Tuzlansko-podrinjske županije, Fuad Hadžić, v.r.
--	---

### 377

U uvjerenju da demokratske institucije zasnovane na poštovanju ljudskih prava i sloboda najbolje stvaraju sklad između sebe i svojih zajednica;

Odbijajući nasilje rata;

Unapređujući mir, slobodu pojedinca, ekonomski razvoj kroz zaštitu privatnog vlasništva i tržišne ekonomije;

Vođeni načelima Povelje Ujedinjenih naroda, Univerzalne deklaracije o ljudskim pravima i Općim okvirnim sporazumom za mir u Bosni i Hercegovini kao i njegovim aneksima;

Skupština Tuzlansko-podrinjskog kantona, u kojoj su predstavljeni narodi i građani Tuzlansko-podrinjskog kantona, kao federalne jedinice Federacije Bosne i Hercegovine koja je sastavni dio suverene države Bosne i Hercegovine, odlučni da osiguraju punu nacionalnu ravnopravnost, demokratske odnose i najviše standarde ljudskih prava i sloboda, na osnovu člana V.1.4. Ustava Federacije Bosne i Hercegovine, na sjednici od 19. 6. 1997. godine, usvaja

### USTAV

#### TUZLANSKO-PODRINJSKOG KANTONA

##### I OSNOVNE ODREDBE

Član 1.

Bošnjaci i Hrvati, kao konstitutivni narodi, zajedno s ostalima, i građani Kantona, ostvaruju svoja suverena prava u državi Bosni i Hercegovini, Federaciji Bosne i Hercegovine (u daljem tekstu: Federacija) i Tuzlansko-podrinjskom kantonu (u daljem

tekstu: Kanton), u skladu sa Ustavom Bosne i Hercegovine i njegovim aneksima, Ustavom Federacije Bosne i Hercegovine i njegovim Aneksom i ovim Ustavom.

#### Član 2.

Kanton je federalna jedinica Federacije koja obuhvata općine i gradove, u sastavu Kantona, u skladu sa federalnim propisima.

#### Član 3.

Sastav svih organa u Kantonu, općinama i gradovima mora odražavati nacionalnu strukturu stanovništva Kantona odnosno općine i grada, ukoliko Ustavom Federacije nije drukčije utvrđeno.

#### Član 4.

Naziv Kantona je: Tuzlansko-podrinjski kanton.  
Sjedište Kantona je u Tuzli.

#### Član 5.

Kanton ima grb, zastavu i pečat. Izgled grba, zastave i pečata Kantona, njihova upotreba i zaštita uređuju se zakonom Kantona.

Kanton može imati druge simbole o kojima odluči Skupština Tuzlansko-podrinjskog kantona (u daljem tekstu: Skupština Kantona).

Simboli Kantona upotrebljavaće se u skladu sa zakonom Kantona.

#### Član 6.

Službeni jezici Kantona su bosanski jezik i hrvatski jezik.  
Službeno pismo je latinica. Ostali jezici mogu se koristiti kao sredstva komunikacije i nastave.

## II LJUDSKA PRAVA I OSNOVNE SLOBODE

#### Član 7.

U ostvarivanju svojih nadležnosti Kanton osigurava i provodi sve mjere zaštite ljudskih prava i sloboda utvrđenih Ustavom Bosne i Hercegovine i njegovim aneksima, Ustavom Federacije i njegovim Aneksom i ovim Ustavom vodeći računa o jednakopravnosti svih naroda i građana u Kantonu, općinama i gradovima.

#### Član 8.

Sve izbjeglice i raseljene osobe, u skladu sa Općim okvirnim sporazumom za mir u Bosni i Hercegovini, imaju pravo slobodnog povratka u prebivališta iz kojih su prognane, tokom etničkog progona i neprijateljstava od 1991. godine.

#### Član 9.

Sve osobe imaju pravo na povrat ukupne imovine koje su lišene tokom etničkog progona i neprijateljstava od 1991. godine.

Ukoliko osobama iz prethodnog stava objektivno nije moguće vratiti imovinu, takve osobe imaju pravo na punu novčanu nadoknadu vrijednosti svoje imovine.

Sve izjave i obaveze date i preuzete pod prijetnjom, prisilom i prijeverom, a koje se odnose na svu pokretnu i nepokretnu imovinu, kao i sva imovinska i neimovinska prava, ništavna su.

Prava iz prethodnih stavova ostvarivaće se u skladu sa Općim okvirnim sporazumom za mir u Bosni i Hercegovini, propisima Bosne i Hercegovine, Federacije Bosne i Hercegovine i ovog Kantona.

#### Član 10.

Organi Kantona, općina i gradova dužni su osigurati uslove za rad i saradnju sa ombudsmenima.

## III NADLEŽNOSTI KANTONALNE VLASTI

#### Član 11.

Kanton je nadležan u svim oblastima koje nisu Ustavom Federacije izričito povjerene federalnoj vlasti, a posebno za:

a) donošenje i provođenje propisa, u okviru utvrđene ekonomske politike, za podsticanje privrednog i društvenog razvoja;

b) uspostavljanje i nadziranje kantonalnih policijskih snaga, koje imaju jedinstvene federalne uniforme sa oznakama Kantona;

c) utvrđivanje i provođenje politike obrazovanja i vaspitanja; d) utvrđivanje i provođenje politike u oblasti nauke, kulture i sporta;

e) utvrđivanje i provođenje stambene politike, uključujući donošenje propisa koji se odnose na uređivanje i izgradnju stambenih objekata;

f) donošenje i provođenje propisa o korišćenju zemljišta, uključujući zoniranje;

g) donošenje i provođenje propisa o postrojenjima za proizvodnju energije i osiguranje njihove dostupnosti;

h) provođenje socijalne politike i uspostavljanje službi socijalne zaštite;

i) donošenje i provođenje propisa o unapređenju lokalnog poslovanja i humanitarnih aktivnosti;

j) utvrđivanje i provođenje politike u vezi sa regulisanjem i osiguranjem javnih službi;

k) utvrđivanje i provođenje politike u vezi sa osnivanjem i radom radija, televizije i drugih sredstava informisanja;

l) finansiranje djelatnosti kantonalne vlasti ili djelatnosti pod nadležnošću kantonalne vlasti oporezivanjem, zaduživanjem ili drugim sredstvima;

m) utvrđivanje i provođenje politike kantonalnog turizma, razvoj turističkih resursa;

n) donošenje propisa o lokalnoj samoupravi u općinama i lokalnoj upravi i samoupravi u gradu, uz odgovarajuću konsultaciju sa općinskim odnosno gradskim vlastima.

#### Član 12.

Kanton i Federacija su, u skladu sa Ustavom Federacije, nadležni za:

a) jamčenje i provođenje ljudskih prava;

b) zdravstvo;

c) politiku zaštite čovjekove okoline;

d) komunikacijsku i transportnu infrastrukturu u skladu sa Ustavom Bosne i Hercegovine;

e) socijalnu politiku;

f) provođenje zakona i drugih propisa o državljanstvu i putnim ispravama državljana Bosne i Hercegovine sa teritorije Federacije i o boravku i kretanju stranaca;

g) turizam;

h) korišćenje prirodnih bogatstava.

## Član 13.

Nadležnosti iz prethodnog člana ovog Ustava mogu biti ostvarivane zajednički ili odvojeno, ili od strane Kantona uz koordinaciju sa federalnom vlašću, dogovarajući se na trajnoj osnovi, u skladu sa potrebama.

## Član 14.

Kanton može prenijeti svoje nadležnosti na općinu i grad na svojoj teritoriji ili na federalnu vlast, na osnovu međusobnog dogovora i prihvatanja.

Kanton može na općinu i grad na svojoj teritoriji prenijeti nadležnosti u vezi sa obrazovanjem, kulturom, turizmom, lokalnim poslovanjem i humanitarnom djelatnošću, te radiom i televizijom, a dužan je to učiniti ako, u pogledu nacionalnog sastava, većinsko stanovništvo te općine odnosno grada, nije većinsko stanovništvo u Kantonu kao cjelini.

Kanton može zaključivati međunarodne sporazume uz prethodnu saglasnost Parlamentarne skupštine Bosne i Hercegovine, osim sporazuma one vrste za koje, po zakonu Parlamentarne skupštine Bosne i Hercegovine, njena saglasnost nije potrebna.

**IV STRUKTURA KANTONALNE VLASTI****A. ZAKONODAVNA VLAST KANTONA****1. Opće odredbe**

## Član 15.

Zakonodavnu vlast Kantona vrši Skupština Kantona. Skupština Kantona je jednodomna.

## Član 16.

Skupština Kantona sastoji se od 50 poslanika.

## Član 17.

Poslanicima Skupštine Kantona mandat traje dvije godine.

U slučaju ratnog stanja, neposredne ratne opasnosti i vanrednih prilika, mandat poslanika izabranih na posljednim izborima produžava se za vrijeme trajanja tog stanja, a najduže šest mjeseci po prestanku tih okolnosti.

## Član 18.

Poslanike u Skupštini Kantona biraju birači na demokratskim i neposrednim izborima, tajnim glasanjem na cijeloj teritoriji Kantona, u skladu sa Ustavom Bosne i Hercegovine i njegovim aneksima, Ustavom Federacije i njegovim Aneksom, ovim Ustavom i zakonima. Svaki birač ima pravo da glasa za bilo koju registrovanu stranku.

Svaki birač može biti biran za poslanika u Skupštini Kantona.

Skupština Kantona bit će sazvana najkasnije deset dana nakon objavljivanja rezultata izbora.

## Član 19.

Skupština Kantona ima predsjednika i zamjenika predsjednika, koji se biraju iz reda poslanika u Skupštini Kantona.

Mandat predsjednika i zamjenika predsjednika traje dvije godine.

Predsjednik predstavlja Skupštinu Kantona, saziva sjednice Skupštine Kantona, predsjedava im i potpisuje akta koja se donose na sjednicama Skupštine Kantona.

Predsjednik Skupštine Kantona vrši funkciju predsjednika Kantona u slučaju kada predsjednik Kantona bude privremeno u nemogućnosti da obavlja svoju dužnost.

Zamjenik predsjednika zamjenjuje predsjednika Skupštine Kantona u slučaju njegove spriječenosti da obavlja svoju dužnost; pomaže predsjedniku Skupštine prilikom predsjedavanja sjednicama Skupštine Kantona.

## Član 20.

Skupština Kantona ima sekretara, koga imenuje na period od dvije godine.

Sekretar Skupštine Kantona pomaže predsjedniku Skupštine Kantona u pripremanju sjednica Skupštine Kantona, osigurava uslove za rad Skupštine Kantona i obavlja poslove i zadatke u vezi sa sjednicama i drugim poslovima utvrđenim poslovnikom ili koje mu povjeri predsjednik Skupštine Kantona.

Sekretar Skupštine Kantona ne može biti krivično gonjen, niti odgovorati u građanskom postupku za bilo koju radnju učinjenu u vršenju svoje funkcije, bez odobrenja Skupštine Kantona.

## Član 21.

Skupština Kantona zasjeda javno, osim u izuzetnim okolnostima predviđenim poslovníkom Skupštine Kantona i objavljuje izvještaje o zasjedanjima i odlukama.

## Član 22.

Prava i obaveze poslanika u Skupštini Kantona utvrdit će se posebnim propisom.

## Član 23.

Poslanici u Skupštini Kantona za vrijeme trajanja mandata uživaju poslanički imunitet.

Protiv poslanika Skupštine Kantona ne može biti pokrenuta građanska parnica, ne mogu biti krivično gonjeni, privedeni, zadržani i pritvoreni odnosno lišeni slobode za bilo koju radnju učinjenu u vršenju svoje funkcije od bilo kojeg organa vlasti, bez odobrenja Skupštine Kantona.

**2. Nadležnost Skupštine Kantona**

## Član 24.

Skupština Kantona:

a) priprema i usvaja Ustav Kantona i amandmane na Ustav Kantona;

b) usvaja budžet Kantona i donosi zakone o oporezivanju i na drugi način osigurava potrebno finansiranje;

c) donosi zakone i ostale propise neophodne za izvršavanje nadležnosti Kantona;

d) odobrava zaključivanje sporazuma sa drugim državama i međunarodnim organizacijama, uz prethodnu saglasnost Parlamentarne skupštine Bosne i Hercegovine;

e) donosi poslovnik Skupštine Kantona;

f) daje autentično tumačenje Ustava, zakona i drugih propisa koje donosi;

g) bira i razrješava predsjednika i zamjenika predsjednika Skupštine Kantona;

h) imenuje i razrješava sekretara Skupštine Kantona;

i) bira i razrješava delegate Kantona u Domu naroda Parlamenta Federacije iz svojih redova, u skladu sa Ustavom Federacije;

- j) bira i razrješava predsjednika Kantona;
- k) potvrđuje imenovanje i razrješnje Vlade Kantona;
- l) utvrđuje nadležnost Kantonalnog i općinskih sudova;
- m) bira i razrješava sudije i sudije - porotnike Kantonalnog suda;
- n) imenuje i razrješava kantonalnog tužioca i zamjenike kantonalnog tužioca;
- o) potvrđuje imenovanje i razrješnje kantonalnog pravobranioca i zamjenike kantonalnog pravobranioca;
- p) vrši i druge poslove utvrđene Ustavom Federacije, ovim Ustavom i zakonom.

Na zahtjev jedne trećine poslanika Skupština Kantona može pokrenuti postupak za utvrđivanje da li su Ustav Kantona, amandmani na Ustav Kantona, predloženi zakon ili zakon koji je usvojila Skupština Kantona, u skladu sa Ustavom Federacije.

### 3. Odlučivanje u Skupštini Kantona

#### Član 25.

Skupština Kantona dvotrećinskom većinom ukupnog broja poslanika:

- a) donosi Ustav Kantona i amandmane na Ustav Kantona,
- b) donosi zakon o prenošenju ili delegiranju kantonalne nadležnosti na federalnu, općinsku ili gradsku vlast;
- c) smjenjuje i razrješava predsjednika Kantona.

Skupština Kantona ostale odluke donosi natpolovičnom većinom ukupnog broja poslanika u Skupštini Kantona.

#### Član 26.

Amandmani na Ustav Kantona stupaju na snagu u ponoć istog dana kada ih usvoji Skupština Kantona.

Kantonalni zakoni stupaju na snagu kao što je u njima određeno, ali ne prije nego što budu objavljeni.

Ostali propisi Kantona mogu stupiti na snagu kao što je u njima određeno, a najranije danom donošenja.

## B. IZVRŠNA VLAST KANTONA

### 1. Predsjednik Kantona

#### Član 27.

Predsjednik Kantona predstavlja i zastupa Kanton i šef je kantonalne izvršne vlasti.

#### Član 28.

Predsjednika Kantona biraju većinom glasova poslanici u Skupštini Kantona između kandidata koje oni predlože, na način predviđen poslovnikom Skupštine Kantona.

#### Član 29.

Ukoliko predsjednik Kantona bude izabran iz reda poslanika Skupštine Kantona, prestaje mu mandat poslanika u Skupštini Kantona.

#### Član 30.

Predsjednik Kantona ima dvogodišnji mandat i ne može biti biran više od dva puta uzastopno.

#### Član 31.

Predsjednika Kantona, ukoliko je prekršio datu svečanu izjavu, na neki drugi način obezvrijedio svoj položaj ili položaj Kantona, Skupština Kantona može smijeniti.

#### Član 32.

Ukoliko mjesto predsjednika Kantona ostane upražnjeno, Skupština Kantona će izabrati novog predsjednika u roku od 30 dana.

U slučaju ratnog stanja, neposredne ratne opasnosti i vanrednog stanja, mandat predsjednika Kantona produžava se za vrijeme trajanja tog stanja, a najduže šest mjeseci po prestanku tih okolnosti.

#### Član 33.

Predsjednik Kantona nadležan je za:

- a) imenovanje Vlade Kantona;
- b) imenovanje kantonalnog pravobranioca i zamjenika kantonalnog pravobranioca;
- c) predlaganje sudija Kantonalnog suda;
- d) predlaganje kantonalnog tužioca i zamjenika kantonalnog tužioca;
- e) donošenje ukaza o proglašavanju zakona koje donosi Skupština Kantona;
- f) provođenje kantonalne politike;
- g) obavještanje Skupštine Kantona o provođenju kantonalne politike utvrđene odlukama i smjernicama Skupštine Kantona i, u vezi s tim, predlaganje Skupštini Kantona razmatranja pojedinih pitanja i donošenja odluka;
- h) potpisivanje i ratifikovanje međunarodnih sporazuma u ime Kantona, koje odobrava Skupština Kantona, uz saglasnost Parlamentarne skupštine Bosne i Hercegovine, osim sporazuma one vrste za koje, po zakonu Parlamentarne skupštine Bosne i Hercegovine, njena saglasnost nije potrebna;

i) davanje pomilovanja za djela utvrđena zakonom;

j) podnošenje zahtjeva Ustavnom sudu Federacije radi utvrđivanja da li je Ustav Kantona i amandman na Ustav Kantona, predloženi zakon ili zakon koga je usvojila Skupština Kantona, u skladu sa Ustavom Federacije;

k) podnošenje zahtjeva Ustavnom sudu Federacije radi utvrđivanja da li je predloženi ili usvojeni propis koji donosi organ kantonalne ili općinske odnosno gradske vlasti u skladu sa Ustavom Federacije;

l) razmatranje izvještaja ombudsmena i osiguravanje uslova za njihov rad;

m) staranje o ostvarivanju saradnje sa organima Federacije;

n) izvršavanje i drugih poslova koje mu povjeri Skupština Kantona

### 2. Vlada Kantona

#### Član 34.

Vladu Kantona čine predsjednik, dva potpredsjednika Vlade i ministri, čiji se broj utvrđuje Zakonom o Vladi Kantona.

Vlada Kantona ima dvogodišnji mandat.

## Član 35.

Predsjednika Vlade imenuje predsjednik Kantona i potvrđuje Skupština Kantona.

## Član 36.

Potpredsjednike Vlade i ministre imenuje predsjednik Kantona, nakon konsultacija sa predsjednikom Vlade ili kandidatom za funkciju predsjednika Vlade, a imenovanje potvrđuje Skupština Kantona.

Svako upražnjeno mjesto popunjava se istim postupkom.

Predsjednik Vlade, potpredsjednici Vlade, ministri, njihovi zamjenici i pomoćnici ne mogu biti poslanici u Skupštini Kantona.

## Član 37.

Vlada Kantona odgovorna je predsjedniku Kantona i Skupštini Kantona.

## Član 38.

Vlada Kantona može se smijeniti odlukom predsjednika Kantona, koju potvrđuje Skupština Kantona, ili izglasavanjem nepovjerenja Vladi većinom glasova u Skupštini Kantona.

Vlada Kantona ili svaki član pojedinačno, mogu dati ostavku predsjedniku Kantona i Skupštini Kantona.

## Član 39.

Predsjednik Kantona može razriješiti predsjednika Vlade Kantona, uz potvrdu Skupštine Kantona.

Predsjednik Kantona, na prijedlog predsjednika Vlade, može razriješiti pojedinog potpredsjednika ili ministra.

## Član 40.

Organizacija Vlade Kantona uređuje se kantonalnim zakonom, u skladu sa ovim Ustavom.

Zakonom Kantona utvrđuje se položaj, prava i dužnosti kantonalne uprave, njihova organizacija i odgovornost, u skladu sa Ustavom Federacije i drugim propisima Federacije i ovim Ustavom, tako da Vlada Kantona odražava nacionalni sastav stanovništva kao cjeline, ali u svakom slučaju da osigurava zastupljenost oba konstitutivna naroda.

## Član 41.

Vlada Kantona nadležna je za:

a) provođenje kantonalne politike, predlaganje i izvršavanje kantonalnih zakona i drugih propisa;

b) izvršavanje odluka svakog kantonalnog ili federalnog suda i vršenje svake druge nadležnosti povjerene Kantonu od federalne vlasti;

c) pripremu prijedloga budžeta;

d) osiguranje saradnje između Vlade Kantona i ombudsmena;

e) nadzor nad istragom i krivičnim gonjenjem u vezi sa kršenjem kantonalnih zakona, kao i nadzor nad kantonalnom policijom;

f) osiguranje da nacionalna struktura policije odražava nacionalnu strukturu stanovništva Kantona, s tim da nacionalna struktura policije svake općine mora odražavati nacionalnu strukturu stanovništva te općine;

g) druga pitanja utvrđena ovim Ustavom i drugim propisima.

## Član 42.

Predsjednik Vlade Kantona nadležan je za:

a) provođenje politike i izvršavanje kantonalnih propisa uključujući osiguranje izvršavanja odluka kantonalnih i federalnih sudova;

b) predlaganje i davanje preporuka iz oblasti kantonalnog zakonodavstva;

c) pripremanje prijedloga budžeta Kantona;

d) druga pitanja utvrđena ovim Ustavom i drugim pro-pisima Kantona.

## Član 43.

Svaki potpredsjednik Vlade Kantona pomaže predsjedniku Vlade Kantona u izvršavanju njegovih nadležnosti i izvršava druge poslove koje mu povjeri predsjednik Vlade Kantona.

Bliže nadležnosti potpredsjednika Vlade utvrđuju se Zakonom o Vladi Kantona.

## Član 44.

Svaki ministar nadležan je za:

a) provođenje kantonalne politike i izvršavanje kantonalnih zakona i drugih propisa iz nadležnosti ministarstva na čijem je čelu;

b) pripremanje propisa iz nadležnosti ministarstva kojim rukovodi i davanje mišljenja i preporuka u vezi s tim propisima;

c) rukovođenje, koordiniranje i nadziranje aktivnosti ministarstva na čijem je čelu;

d) izdavanje uputstava, instrukcija, naredbi i donošenje propisa u cilju omogućavanja izvršavanja zakona iz nadležnosti ministarstva na čijem je čelu;

e) pripremanje, objašnjavanje i analiziranje budžetskih prijedloga iz nadležnosti ministarstva na čijem je čelu;

f) davanje odgovora na pitanja poslanika u Skupštini Kantona, iz nadležnosti ministarstva na čijem je čelu;

g) pomaganje predsjedniku Vlade Kantona u vođenju politike i izvršavanju zakona Kantona i drugih propisa;

h) izvršavanje i drugih zadataka koje mu povjeri predsjednik Vlade Kantona.

## Član 45.

U vanrednim prilikama, za vrijeme trajanja opasnosti po zemlju i Kanton i kada postoji objektivna nemogućnost da se sazove Skupština Kantona, Vlada Kantona je ovlaštena da donosi propise od vitalnog značaja za Kanton iz nadležnosti Skupštine Kantona, kojima se ne mogu derogirati prava i slobode utvrđene Ustavom Federacije, ovim Ustavom i drugim propisima.

Propis donesen u skladu sa prethodnim stavom Vlada Kantona će, odmah po prestanku okolnosti zbog kojih Skupština Kantona nije mogla zasjedati, podnijeti Skupštini Kantona na potvrđivanje.

U slučaju ratnog stanja, neposredne ratne opasnosti i vanrednih prilika, Vladi Kantona produžava se mandat, za vrijeme trajanja tog stanja, a najduže šest mjeseci po prestanku tih okolnosti.

## Član 46.

Predsjednik Kantona, predsjednik Vlade Kantona i potpredsjednici Vlade Kantona i ministri ne mogu biti krivično

gonjeni, niti odgovorni u građanskom postupku za bilo koju radnju učinjenu u vršenju svoje funkcije.

O imunitetu nosilaca izvršne vlasti, iz prethodnog stava, odlučuje Skupština Kantona.

### C. SUDSKA VLAST KANTONA

#### Član 47.

Sudsku vlast u Kantonu vrše Kantonalni sud i općinski sudovi. Sudovi u Kantonu osnivaju se zakonom Kantona, a njihovo finansiranje će se vršiti iz budžeta Kantona.

Najviši sud Kantona je Kantonalni sud Tuzlansko-podrinjskog kantona.

#### Član 48.

Sudska vlast u Kantonu je samostalna, nezavisna i vrši se na osnovu ustava, zakona i drugih propisa.

#### Član 49.

Sudovi u Kantonu osiguravaju jednak položaj svim stranama u sudskim postupcima.

#### Član 50.

Sudski postupci su javni, ukoliko zakonom nije drukčije određeno.

Presude se objavljuju javno.

#### Član 51.

Nadležnost sudova u Kantonu i postupak pred njima uređuje se zakonom.

#### Član 52.

Jednoobraznost u postupanju, kao i osnovni principi pravičnosti u postupcima pred svim sudovima, uspostaviće se zakonom Federacije.

Svaki sud utvrđuje svoju unutrašnju organizaciju.

#### Član 53.

Zakonom Kantona utvrđuje broj sudija i sudija - porotnika Kantonalnog i općinskih sudova.

#### Član 54.

Sudije Kantonalnog i općinskih sudova biraju se iz reda uglednih pravnika najviših moralnih osobina.

Sudije Kantonalnog i općinskih sudova neće biti krivično gonjeni niti odgovorni u građanskom postupku za radnju učinjenu u vršenju svoje funkcije.

#### Član 55.

Sudije Kantonalnog suda predlaže predsjednik Kantona, a bira ih Skupština Kantona.

Sudije - porotnike Kantonalnog suda predlaže predsjednik Kantonalnog suda, a bira ih Skupština Kantona.

Nacionalna struktura sudija u cijelini odražava nacionalnu strukturu stanovništva Kantona.

#### Član 56.

Sudije Kantonalnog i općinskih sudova bit će u službi do dobi od 70 godina, ukoliko ne daju ostavku ili ne budu smije-njeni i to:

a) sudije Kantonalnog suda konsenzusom sudija Vrhovnog suda;

b) sudije općinskih sudova konsenzusom sudija Kantonalnog suda.

Uslovi za vršenje sudijske funkcije utvrđice se posebnim zakonom Kantona.

Plaće i druge naknade ne mogu biti umanjivane tokom njihove službe.

#### Član 57.

Sudije Kantonalnog suda biraju predsjednika Suda u skladu sa zakonom.

#### Član 58.

Općinske sudove osniva Skupština Kantona za područje jedne ili više općina.

#### Član 59.

Općinski sudovi imaju izvornu nadležnost za sve građanske i krivične stvari, osim ako Ustavom Federacije, zakonom Federacije, ovim Ustavom ili zakonom Kantona dio izvorne nadležnosti nije prenesen na neki drugi sud.

#### Član 60.

Sudije općinskih sudova imenuje predsjednik Kantonalnog suda nakon konsultacija sa općinskim načelnikom.

Sudije - porotnike općinskih sudova imenuje predsjednik Kantonalnog suda na prijedlog predsjednika općinskog suda.

#### Član 61.

Sudije općinskog suda biraju predsjednika toga suda, u skladu sa zakonom.

### D. SAVJETI KANTONA

#### Član 62.

Kanton može, zajedno sa drugim kantonima, osnivati savjete kantona u cilju koordiniranja politike i aktivnost u vezi sa pitanjima od zajedničkog interesa, te u sklopu savjeta osnivati koordinaciona tijela, komisije i radne grupe radi razmjene informacija i usklađivanja aktivnosti kantona u izvršavanju njihove nadležnosti, ali ne mogu obuhvatati vojne ili političke dogovore.

### V DAVANJE SVEČANE IZJAVE

#### Član 63.

Prilikom stupanja na dužnost poslanici u Skupštini Kantona, predsjednik Kantona, predsjednik i članovi Vlade Kantona, daju svečanu izjavu.

Tekst svečane izjave glasi:

“Svečano izjavljujem da ću povjerenu dužnost obavljati savjesno i odgovorno; pridržavati se ustava Bosne i Hercegovine, Federacije Bosne i Hercegovine i Tuzlansko-podrinjskog kantona; da ću se zalagati za ljudska prava, slobode i ravnopravnost građana i naroda Bosne i Hercegovine”.

Prilikom stupanja na dužnost, sudije i sudije - porotnici Kantonalnog i općinskih sudova; kantonalni tužilac, zamjenici kantonalnih tužilaca; općinski tužioci, zamjenici općinskih tužilaca; kantonalni pravobranilac i zamjenici kantonalnog pravobranioaca, daju svečanu izjavu.

Tekst svečane izjave iz prethodnog stava utvrđuje se posebnim zakonom.

**VI OPĆINSKA I GRADSKA VLAST****1. Opće odredbe**

## Član 64.

Građanima se jamči pravo na lokalnu samoupravu.

## Član 65.

Lokalna samouprava ostvaruje se u općini i gradu kao teritorijalnim jedinicama lokalne samouprave.

Područje općine, njen naziv, ukidanje ili spajanje, promjene granica, kao i druga pitanja od značaja za teritorijalne jedinice lokalne samouprave, uređuju se posebnim zakonom.

Za područje dvije ili više općina koje su urbano i teritorijalno povezane svakodnevnim potrebama građana, može se formirati grad kao jedinica lokalne uprave i samouprave, u skladu sa posebnim zakonom.

Samoupravni djelokrug jedinica lokalne samouprave, oblici neposrednog učestvovanja građana u odlučivanju, organi jedinica lokalne samouprave, imovina i finansiranje lokalne samouprave, akti jedinica lokalne samouprave, nadzor i zaštita lokalne samouprave i druga pitanja od značaja za ostvarivanje lokalne samouprave bliže će se urediti kantonalnim zakonom.

## Član 66.

U ostvarivanju svojih nadležnosti svaka općina:

a) preduzima sve potrebne mjere zaštite i osigurava uslove za poštivanje ljudskih prava i sloboda utvrđenih Ustavom Bosne i Hercegovine i aneksima Općeg okvirnog sporazuma za mir u Bosni i Hercegovini, Ustavom Federacije i u instrumentima u Aneksu Ustava Federacije i djeluje u skladu sa Ustavom Bosne i Hercegovine, Ustavom Federacije, federalnim zakonom, ovim Ustavom i kantonalnim zakonom o lokalnoj samoupravi; statutom općine i drugim općinskim propisima;

b) izvršava svoje nadležnosti vodeći računa o nacionalnoj strukturi stanovništva u toj općini.

Lokalne vlasti će, u granicama zakona, imati puno diskreciono pravo da provode svoje inicijative u vezi sa svim stvarima koje nisu isključene iz njihove nadležnosti, niti stavljene u nadležnost neke druge vlasti.

Prilikom prenošenja nadležnosti na općinu ili grad vodiće se računa o obimu i prirodi posla, kao i o zahtjevima efikasnosti i ekonomičnosti.

U slučajevima prenošenja nadležnosti sa kantonalnih na lokalne vlasti, lokalnim vlastima će, u što je moguće većoj mjeri, biti dozvoljeno da prilagođavaju njihovo provođenje u lokalnim uslovima.

Lokalne vlasti bit će konsultovane, u najvećoj mogućoj mjeri, pravovremeno i na odgovarajući način, u procesu planiranja i donošenja odluka o svim stvarima koje ih se direktno tiču.

## Član 67.

U ostvarivanju svojih nadležnosti grad će prvenstveno:

a) osigurati uslove za poštivanje i zaštitu ljudskih prava i osnovnih sloboda u skladu sa Ustavom Bosne i Hercegovine i aneksima Općeg okvirnog sporazuma za mir u Bosni i Hercegovini, Ustavom Federacije i Aneksu na Ustav Federacije, zakonima Federacije, ovim Ustavom, kantonalnim zakonom, statutom grada i drugim gradskim propisima;

b) osigurati potrebe gradskog stanovništva u oblasti zajedničke infrastrukture i javnog prometa;

c) upravljati gradskom imovinom;

d) voditi poresku politiku i osigurati finansijska sredstva neophodna za funkcioniranje grada, u skladu sa federalnim i kantonalnim zakonom.

Ostale nadležnosti grada bliže će se urediti kantonalnim zakonom.

## Član 68.

Građani mogu neposredno odlučivati o poslovima od interesa i značaja za lokalno stanovništvo putem referendum a i zbora građana u skladu sa zakonom i statutom općine ili grada.

Građani imaju pravo podnijeti građansku inicijativu za rješavanje određenih pitanja u skladu sa zakonom.

Građani imaju pravo da, u skladu sa zakonom i statutom općine ili grada, osnivaju i druge oblike mjesne samouprave.

## Član 69.

Prava povjerena općini odnosno gradu će, po pravilu biti puna i isključiva. Ona ne smiju biti uskraćena ili ograničena od strane kantonalnih vlasti, osim u slučajevima predviđenim zakonom.

Organi općine i grada samostalni su u obavljanju poslova od interesa i značaja za lokalno stanovništvo i samostalno odlučuju o organiziranju upravnih službi za potrebe općina odnosno grada.

Nadzor nad radom organa lokalne samouprave vrši se po postupku predviđenim zakonom.

Upravni nadzor nad radom organa lokalne samouprave može se vršiti u granicama i na način kojim se osiguravaju prava i dužnosti općine odnosno grada utvrđena Poveljom o lokalnoj samoupravi odnosno federalnim zakonom.

## Član 70.

Općina i grad imaju pravo na odgovarajuće sopstvene izvore prihoda, kao i da samostalno raspoložu sredstvima koja im pripadaju.

Općini i gradu pripadaju prihodi utvrđeni zakonom, kao i sredstva koja dodjeljuje Kanton ili Federacija za obavljanje delegiranih ili prenesenih nadležnosti iz okvira prava i dužnosti Kantona i Federacije.

## Član 71.

Općina i grad imaju statut.

Statutom se uređuje samoupravni djelokrug organa i organizacija općine odnosno grada.

Statut općine i grada mora biti u skladu sa Ustavom Bosne i Hercegovine, Ustavom Federacije i Aneksom na Ustav Federacije, ovim Ustavom i kantonalnim zakonima.

## Član 72.

Općine i gradovi u vršenju svojih nadležnosti sarađuju međusobno i sa drugim općinama i gradovima u svijetu, u skladu sa Evropskom poveljom o lokalnoj samoupravi.

Općine i gradovi, radi unapređenja i zaštite njihovih zajedničkih interesa i potreba, mogu se udružiti u zajednicu općina i gradova Bosne i Hercegovine.

**2. Općinsko i gradsko vijeće**

## Član 73.

Općina ima općinsko vijeće.  
Grad ima gradsko vijeće.

## Član 74.

Broj članova općinskog odnosno gradskog vijeća, postupak izbora trajanje mandata članova općinskog i gradskog vijeća utvrđuje se statutom općine odnosno grada.

Općinsko vijeće ne može imati manje od 15 niti više od 30 vijećnika.

Gradsko vijeće ne može imati manje od 15 niti više od 30 vijećnika, s tim da je svaka općina zastupljena jednakim brojem vijećnika.

## Član 75.

Mandat članova općinskog i gradskog vijeća je dvije godine, s tim da mandat članova općinskog i gradskog vijeća izabranih na prvim poslijeratnim izborima traje jednu godinu.

U slučaju ratnog stanja, neposredne ratne opasnosti i vanrednih prilika, mandat članova općinskog i gradskog vijeća izabranih na posljednim izborima se produžava za vrijeme trajanja tog stanja, a najduže šest mjeseci po prestanku tih okolnosti.

## Član 76.

Članove općinskog vijeća biraju demokratskim putem birači na neposrednim i tajnim izborima na cijelom području općine. Svaki birač ima pravo glasati za bilo koju registriranu stranku i biti biran za vijećnika. Svaka stranka će dobiti broj vijećničkih mjesta srazmjerno procentu osvojenih glasova.

Vijećnike u gradsko vijeće delegiraju vijećnici općinskog vijeća svake općine koja čini grad, većinom glasova vijećnika u općinskom vijeću.

## Član 77.

Općinsko vijeće:

- priprema i donosi statut općine, koji se usvaja dvotrećinskom većinom;
- bira i smjenjuje općinskog načelnika;
- usvaja budžet općine i donosi propise o oporezivanju i na druge načine osigurava potrebno finansiranje koje nisu osigurali kantonalna ili federalna vlast;
- donosi poslovnik o svome radu;
- donosi druge propise u izvršavanju općinskih nadležnosti.

Gradsko vijeće:

- priprema i donosi statut grada dvotrećinskom većinom;
- bira i smjenjuje gradonačelnika;
- donosi budžet grada;
- donosi propise u izvršavanju svojih i prenesenih nadležnosti i vršenje drugih poslova utvrđenih statutom.

## Član 78.

Općinsko i gradsko vijeće zasjedaju javno, osim u izuzetnim slučajevima predviđenim poslovnikom i objavljuju izvještaje o zasjedanjima i donesenim odlukama.

## Član 79.

Općinski i gradski propisi stupaju na snagu kao što je u njima propisano, ali ne prije nego što budu objavljeni.

**3. Općinski načelnik i gradonačelnik**

## Član 80.

Općina ima općinskog načelnika.  
Grad ima gradonačelnika.

Odredbe o izboru i smjenjivanju općinskog načelnika i gradonačelnika uređuje se statutom općine odnosno grada.

Mandat općinskog načelnika i gradonačelnika traje dvije godine, s tim da mandat općinskog načelnika i gradonačelnika izabranih na prvim poslijeratnim izborima traje jednu godinu.

## Član 81.

Nespojive su funkcije općinskog načelnika i gradonačelnika sa funkcijom vijećnika općinskog odnosno gradskog vijeća.

## Član 82.

Općinski načelnik nadležan je za:

- imenovanje i smjenjivanje općinskih službenika;
- provođenje općinske politike, izvršavanje općinskih propisa i delegiranih ili prenesenih nadležnosti općini od kantonalne i federalne vlasti;
- osiguranje saradnje općinskih službenika sa ombudsmenima;
- podnošenje izvještaja općinskom vijeću i javnosti o provođenju politike općinskog vijeća i svojim aktivnostima;
- staranje o organizaciji općinske uprave i njenom radu;
- rukovođenje radom općinskih službi i općinskih službenika;
- konsultacije za izbor sudija općinskog suda;
- pripremanje prijedloga koje razmatra općinsko vijeće i
- vršenje drugih poslova utvrđenih zakonima i statutom općine.

## Član 83.

Gradonačelnik je nadležan za:

- imenovanje i smjenjivanje gradskih službenika;
- provođenje gradske politike i izvršavanje gradskih propisa i delegiranih ili prenesenih gradskih od kantonalnih i federalnih vlasti;
- osiguranje saradnje gradskih službenika sa ombudsmenima;
- podnošenje izvještaja gradskom vijeću i javnosti o provedbi politike gradskog vijeća;
- staranje o organizaciji lokalne uprave i samouprave i njenom radu;
- rukovođenje radom gradskih službi i gradskih službenika;
- pripremanje prijedloga koje razmatra gradsko vijeće;
- vršenje drugih poslova utvrđenih zakonima i statutom grada.

**VII AMANDMANI NA USTAV KANTONA**

## Član 84.

Amandmane na Ustav Kantona može predlagati predsjednik Kantona, Vlada Kantona, većina poslanika u Skupštini i većina bošnjačkih ili hrvatskih poslanika u Skupštini Kantona.



Predloženi amandman na Ustav Kantona neće se razmatrati u Skupštini Kantona prije isteka roka od dvije sedmice nakon što je prvi put bio podnesen.

#### Član 85.

Ukoliko Skupština Kantona odbije predloženi amandman, novi amandman o istom pitanju ne može se predložiti prije isteka šest mjeseci od dana kada je amandman odbijen.

Amandmanom na Ustav Kantona ne može se ukinuti niti umanjiti nijedno od prava i sloboda utvrđenih u Ustavu Bosne i Hercegovine i aneksima Općeg okvirnog sporazuma za mir u Bosni i Hercegovini, Ustavu Federacije Bosne i Hercegovine i instrumentima predviđenim u Aneksu Ustava Federacije, niti promijeniti ovaj član Ustava Kantona.

### VIII ODREDBE O POSTUPKU ZA DONOŠENJE ZAKONA

#### Član 86.

Inicijativu za donošenje zakona, drugih propisa i općih akata mogu pokrenuti građani, preduzeća, udruženja i druge organizacije i zajednice, političke organizacije i državni organi.

Pravo predlaganja donošenja zakona, drugih propisa i općih akata ima svaki poslanik u Skupštini Kantona, radna tijela Skupštine Kantona, predsjednik Kantona, Vlada Kantona, općinska i gradska vijeća.

#### Član 87.

Postupak donošenja zakona obuhvata razmatranje nacrtu zakona i prijedloga zakona.

Izuzetno zakon se može donijeti po hitnom odnosno skraćenom postupku.

Bliže odredbe o načinu i postupku donošenja zakona propisuju se Poslovníkom Skupštine Kantona.

### IX USVAJANJE USTAVA KANTONA

#### Član 88.

Ovaj Ustav stupa na snagu u ponoć istog dana kada ga usvoji Skupština Kantona.

Ovaj Ustav objavit će se u službenom glasilu Kantona.

#### Član 89.

Danom stupanja na snagu ovog Ustava prestaje važiti Ustavni zakon Tuzlansko-podrinjskog kantona, koji je usvojen i proglašen 22. 8. 1994. godine i Amandmani I-X na Ustavni zakon Tuzlansko-podrinjskog kantona, koji su usvojeni i proglašeni 29. novembra 1996. godine.

### X PRIJELAZNE ODREDBE

#### Član 90.

Svi zakoni, drugi propisi koji su na snazi u Kantonu na dan stupanja na snagu ovog Ustava, ostaće na snazi u mjeri u kojoj nisu u suprotnosti sa ovim Ustavom.

#### Član 91.

Nijedna osoba koja izdržava kaznu izrečenu od strane suda, za teško kršenje međunarodnog humanitarnog prava, i nijedna osoba koja

je optužena od strane suda, za teško kršenje međunarodnog humanitarnog prava, ne može se kandidovati ili vršiti bilo koju izbornu ili drugu javnu funkciju.

#### Član 92.

Objavljeni rezultati popisa stanovništva iz 1991. godine primjenjivat će se u svim potrebnim situacijama koje zahtijevaju podatke o stanovništvu.

Bosna i Hercegovina  
Federacija Bosne i Hercegovine  
TUZLANSKO-PODRINJSKI

KANTON

Skupština

Broj: 01-011-240-14/97

Tuzla, 19. 6. 1997. g.

Predsjedavajući

Skupštinom Tuzlansko-podrinjskog  
kantona,

Fuad Hadžićević, v.r.



## 377

U uvjerenju da demokratske institucije utemeljene na štovanju ljudskih prava i sloboda najbolje stvaraju sukladnost između sebe i svojih zajednica;

Odbijajući nasilje rata;

Unapređujući mir, slobodu pojedinca, ekonomski razvitak kroz zaštitu privatnog vlasništva i tržišne ekonomije;

Vođeni principima Povelje Ujedinjenih naroda, Univerzalne deklaracije o ljudskim pravima i Općim okvirnim sporazumom za mir u Bosni i Hercegovini kao i njegovim aneksima;

Sabor Tuzlansko-podrinjske županije, u kojoj su predstavljeni narodi i građani Tuzlansko-podrinjske županije, kao federalne jedinice Federacije Bosne i Hercegovine koja je sastavni dio suverene države Bosne i Hercegovine, odlučni da osiguraju punu nacionalnu ravnopravnost, demokratske odnose i najviše standarde ljudskih prava i sloboda, na temelju članka V.1.4. Ustava Federacije Bosne i Hercegovine, na sjednici od 19. 6. 1997. godine, usvaja

## USTAV

### TUZLANSKO-PODRINJSKE ŽUPANIJE

#### I TEMELJNE ODREDBE

##### Članak 1.

Bošnjaci i Hrvati, kao konstitutivni narodi, zajedno s ostalima, i građani Županije, ostvaruju svoja suverena prava u državi Bosni i Hercegovini, Federaciji Bosne i Hercegovine (u daljem tekstu: Federacija) i Tuzlansko-podrinjskoj županiji (u daljem tekstu: Županija), sukladno Ustavu Bosne i Hercegovine i njegovim aneksima, Ustavu Federacije Bosne i Hercegovine i njegovim Aneksom i ovom Ustavu.

##### Članak 2.

Županija je federalna jedinica Federacije koja obuhvaća općine i gradove, u sastavu Županije, sukladno federalnim propisima.

##### Članak 3.

Sastav svih organa u Županiji, općinama i gradovima mora odražavati nacionalnu strukturu pučanstva Županije odnosno općine i grada, ukoliko Ustavom Federacije nije drukčije utvrđeno.

##### Članak 4.

Naziv Županije je: Tuzlansko-podrinjska županija.  
Sjedište Županije je u Tuzli.